

El túrna a zeî dal cavaleîn, e 'l ga dei: — „Cavaleîn, biêl cavaleîn, ti m'îe deîto che quila pîna saruó la ma muórto! El ri vol (*var.* biégna) chi ga zémo a ciú el pavón, el dei: Cumú i vémo da fá?“ — „Básta; el ga dei el cavaleîn, deîghe al ri che 'l ta dágo oûna scudiéla, dúi çeîme de pan, oûna buteîlgia de rusuólgio (*var.* rusuleîa) e oûn spiécio.“ —

El ri ga dá doûta sta ruóba, e lúri, i va a caminádo. A caminádo chi va, i cáta 'l pavón sun quíl pósto chi lu viva lagá; loû, el ga fá oûna scudiéla de sùpe; el pavón ven par magnále, loû, el lu ciápa e 'l su lu puórta veîa. El va là dal ri e 'l ga dei: — „Quá, Sácrâ Maistá, el pavón.“ —

La fáda, alúra, ga túrna a dei al ri: — „Maistá, el g' uó ciúlto la pîna, el g' uó ciúlto el pavón, el ga va a ciú la Biéla dal móndo.“ — El ga dei el ri: — „Cumú mái i vulí ch'el ma vágo a ciú la Biéla dal móndo?“ — La ga dei la fáda: — „Ma, siúr seî, Sácrâ Maistá, che 'l ga la va a ciú!“ — „Ben; el ga dei el ri, dónca ciamímalo.“ — La fáda va là da stu zúvano, la ga dei: — „Quíl zúvano, Su Maistá va ciáma!“ — „Chi vól lo, Sácrâ Maistá?“ — „Sintí, el ga dei el ri: — „I m'aví ciúlto la pîna, i m'aví ciúlto 'l pavón, zíme a ciú la Biéla dal móndo.“ — El ga dei loû: — „Sácrâ Maistá, cumú el vol chi ga vágo a ciú la Biéla dal móndo?“ — „Mah!, el ga dei el ri, biégna chi ma la zi a ciú; se nuó, i zi a la muórto.“ — Loû, el va zú dal cavaleîn, e 'l ga dei: — „Ah, cavaleîn, biêl cavaleîn, ti m'îe deîto che quila pîna saruó la ma muórto!“ — El ga dei el cavaleîn: — „Chi el t' uó deîto el ri?“ — „El m' uó deîto, ch' i vágo a ciúghe la Biéla dal móndo.“ — El ga dei: — „Cumú i vémo da fá?“ — Básta; el dei el cavaleîn: deîghe che 'l ta dágo oûna gran fragáda gránda, piéna de zuóje²⁶⁾, de barlánti²⁷⁾, de géme.“ —

El ri ga dá doûta sta ruóba, e lúri i va in quíl país, là ch' a gîra la Biéla dal móndo. I sa cuósta al mul cu sta fragáda, e i fa fá la streîda ch' a zi rivá oûna gran fragáda, che mái nûnda zi stá oûna cunpágnâ, che doûti la vágo a vídi. A va oûn móndo de zénto, e a va áncâ la siérva de la Biéla dal móndo. — „Quila zúvana, i ga dei luri, úla zi la vóstra

²⁶⁾ Gioje. ²⁷⁾ Brillanti.